

Newspaper	Berita Harian
Date	24 March 2016

Najib lawat Pusat Jagaan Al Fikrah

BH - 24/3/2016

Kajang: Perdana Menteri, Datuk Seri Najib Razak semalam meluangkan masa menyelami kehidupan penghuni Pusat Jagaan Al Fikrah Malaysia, Kampung Sungai Sekamat, dekat sini.

“Saya singgah sebentar di Pusat Jagaan Al Fikrah Malaysia, yang memberi perlindungan kepada seramai 70 penghuni yang hilang tempat berteduh akibat sebab tertentu,” katanya di laman Facebook beliau.

Pusat Jagaan Al Fikrah yang dibuka akhir 2012 adalah rumah kebajikan bagi lelaki dan wanita pesakit kronik, terdampar tanpa waris, orang kurang upaya (OKU), warga tua dan muafak.

Penghuninya berusia antara 21 tahun sehingga 103 tahun, terdiri daripada berbilang bangsa dan agama.

Sementara itu, Perdana Menteri juga menerima kunjungan hormat enam ketua perwakilan Malaysia ke luar negara yang baru dilantik di Bangunan Parlimen.

Mereka terdiri daripada empat duta besar dan dua pesuruhjaya tinggi. Duta Besar ialah bekas Menteri Perdagangan Dalam Negeri, Koperasi dan Kepenggunaan, Datuk Seri Hasan Malek (Kemboja), Shahril Effendi Abd Ghany (Oman), Datuk Ayauf Bachi (Ukraine) dan Datuk Ahmad Fadil Shamsuddin (Poland). Pesuruhjaya Tinggi pula, Datuk Ilango Karuppattan (Singapura) dan Wan Zaidi Wan Abdullah (Sri Lanka).

Bekas Menteri Perusahaan Perladangan dan Komoditi, Tan Sri Bernard Dompok pula menjadi Duta Besar Malaysia yang pertama ke Holy See (Vatican).